

Dithero tsa Tirelano mo Kutlwanong

46/2015 Thero ka Sontaga wa 14. Morago ga moletlo wa Borarobongwe, e le ka 06. 09. 2015

Moletlo wa go lebogela thobo

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang moletlo ono le kgwadilwe mo go Pes. 145:15, le re: **"Matlho a ba botlhe a lebile wena, mme o ba naya dijo tsa bona ka nako e e lebanyeng."**

1. Sefela sa 360 - 330/341

2. Thapelo: Modimo, Rara yo o mo legodimong, re a go leboga, re galaletsa leina la gago, gonne o re file sejo sa rona ka metlha gore re tshele. Re kopa Mowa o o Boitshepo gore o re rute tebogo ka malatsi otlhe a a molemo le a a bosula, re lemoge ka metlha bopelotlhomogi le lorato lwa gago. Re lebogela sejo sa mowa se e leng Lefoko la gago le selalelo se se boitshepo sa ga Morwao. Re a kopa gore o re bolokele dijo ka metlha, re se kgore fela ka sejo sa mmele, mme bogolo re kgorisiwe le ka sejo se se boitshepo sa gago. Tseo re di kopa mo leineng la ga Jesu Keresete, Mopholosi wa rona. Amen.

3. Lefoko la Testamente e kgologolo le kwadilwe mo go Jes. 58:y012;

Epistolo ka fa thulaganyong ya 2 e kwadilwe mo go 2 Bakorinthe 9:6-15;

Efangele ka fa thulaganyong ya 3 e kwadilwe mo go Matheo 6:19-23.

4. A go ipolelwe tumelo ya bokeresete!

5. Sefela sa 13 - 13/14

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Luka 12:13-21, e re: "Ke fa mongwe mo bontsing a mo raya a re: 'Moruti, raya morwa-rre gore a kgaogane boswa le nna.' Mme Jesu a mo raya a re: 'Motho ke wena, ke mang yo o mpeileng go nna moatlhodi gongwe mokgaoganyi wa boswa jwa lona?' A boa a ba raya a re: 'Elang tlhoko, lo itise mo

megagarung yotlhe; gonne le fa mongwe a na le letlotlo, ga a bone botshelo ka tse a nang natso.' A ba a bua nabo ka setshwantsho a re: 'Masimo a motho mongwe wa mohumi a ne a ungwa thata. Mme a ikakanya a re: 'Ke tla dira eng, ka ke se na mo nka bolokelang thobo ya me teng?' A ikaraba a re: 'Ke tla dira jaana: Ke tla rutla difala tsa me, ke aga tse dikgolo, ke bolokela mabele aotlhe le dikhumo tsa me teng, jaanong ke raya mowa wa me ke re: Mowa wa me, o na le dikhumo tse dintsi tse di lekanyeng dinyaga tse dintsi. Ikhutse, o je, o nwe, o ipele.' Mme Modimo wa mo raya wa re: 'Lesilo ke wena! Mowa wa gago o tla tlosiwa mo go wena mo bosigong jono; mme dilo tse o di kgobokantseng e tla nna tsa ga mang?' 'Yo o iphuthelang matlotlo, mme a sa huma ka fa Modimong, o ntse jalo.'" Amen.

8. Thero: Phuthego e e rategang mo Moreneng wa rona Jesu Keresete yo e leng senkgwe sa botshelo, moletlo o wa go lebogela thobo ke moletlo o montle, ke moletlo o o tlokegang mo botshelong jwa rona ba re leng batho, gonne re na le bolwetse jwa go lebala bopelotlhomogi le bopelontle jwa ga Rara yo o mo legodimong. Moletlo ono o rata go re gopotsa kajeno gore re leboge Modimo wa rona, ka gonne o re neile dijo ka metlha ka bopelotlhomogi jo bogolo jwa ona. Re ipolela ka mafoko a Kategisima e nnye, re re: "O ntlamela thata ka malatsi otlhe ka tsotlhe tse di batlegang mo botshelong jono, o ntshireletsa ruri mo ditlalelong tsotlhe, o bile o mphemela mo masuleng otlhe. Tsotlhe tseo o di ntirela fela ka ntlha ya bopelontle jwa gagwe le boutlwelobotlhoko jwa gagwe, ka e le Rre le Modimo wa me, nna ke se na tshiamo, le fa e le tshwanelo epe. Ke ka moo ke tshwanetseng go mo leboga, le go mo tumisa, le go mo direla, le go mo utlwa. Tseo ke nnete ruri." A re se ka ra lebala tseo ka gope, mme re leboge Modimo ka botshelo jotlhe jwa rona ka ntlha ya boutlwelobotlhoko le bopelontle jwa ona, rona ba re leng bana ba ons ka kolobetso.

Lefoko la thero ya kajeno le lentle tota, le a re ruta, le go re gomotsa, le go re kaela, le go re nyatsa, le go re gogela mo go Jesu Keresete yo e leng Mopholosi wa rona. Le re supetsa Modimo o e leng Rraetsho yo o mo legodimong, Motlhodi le Mmoloki wa rona. Ke nnete Modimo o re tlhodile, o re tlamela ka malatsi otlhe ka tsotlhe tse re di tlhokang gore re se tlhoke mo botshelong jwa rona jwa mo lefatsheng, mme re tshele sentle. Modimo, Mmoloki wa rona, o rata gore re itumelele tse re di amogelang mo go ene, re ipolele gore di a lekana. Jesu o re ruta kajeno gore re itumelele tse re nang natso. Re a itse gore go thata go kgotsofadiwa, gonne ka fa tthagong ya rona ga re kgotsofadiwe ka botlhofo, gonne

matlho a rona a eletsakiswa ke tse di mo lefatsheng. Le molomo o a eletsakiswa, le diatla tsa rona. Tota lefatshe le a re eletsakisa. Le noga mo tshimong ya kwa Etene e eletsakisitse batho ba ntlha. Modimo wa laela gore ba se je maungo a ditlhare tse di mo gare ga tshimo, mme moraedi o ne a raela Efa gore a je; a **eletsakisa** matlho a gagwe ka maungo a setlhare se se ilesegileng, Efa o ne a raelwa ka keletso ya gagwe ya go rata go tlhalefa, le ya go tshwana le Modimo. O ne a ja ga maungo a Modimo o laetseng ka ona gore ba se ka ba a ja. Go ja ga bone go re bontsha, go fitlha mo letsatsing la kajeno gore motho ga a kgore. Ka metlha o eletsa go ja se sengwe. Ga a kgore ka sejo se Modimo o se mo abelang, mme o batla se sengwe. A re itiseng mo dikeletsong tsotlhe gore re se tsene mo maleong.

Mme batho ba a re eletsakisa. Barekisi ba batla go rekisa dithoto tsa bone, ba a batla gore re reke. Rona ba re sa kgoreng, le e seng go kgotsofala, re a phutha, le go kgobokanya dithoto tse dintsi. Jesu Keresete o a re kaela, o re ruta ka gore botshelo jwa rona ga bo eme ka bontsi jwa dithoto, le e seng go tshegediwa ke tsona. A re ithuteng seo, re tile, le go thiboga megagaru yotlhe, re lemoge, re ithute mo go ene yo e leng Mopholosi wa rona gore botshelo jwa rona ke jo bo ntseng jang. Ga bo eme ka bontsi jwa dithoto, mme bo eme, le go tshegediwa ka go dumela, le go ikanya Modimo, o e leng Rara le Morwa le Mowa o o Boitshepo.

Thabo, boitumelo, thatano mo nyalanong, bana ba ba boifang Modimo, le badiredi ba ba boifang Modimo, babusi ba ba siameng ba ba ikanyegileng, mebuso e e molemo, pula, le kagiso, botshelo mo mmeleng, mekgwa e mentle, tlotlego, ditsala tse di siameng, baagisanyi ba ba ikanyegileng, tse tsotlhe tseo ga di rekwe ka madi. Madi a re thusa mo lefatsheng. Dithoto di a thusa, mme ga di kgone go baakanya tsotlhe tse di tlhokegang mo botshelong jwa rona. A re tileng, le go thiboga go direla madi!

Jesu Keresete o re ruta ka ga megagaru, a re: Re tshwanetse go tila megagaru, le go thiboga mefuta yotlhe ya megagaru. O re lemosa ka Lefoko la gagwe kajeno gore re se eletse, le e seng go batla, go eletsaka, le e seng go legalega ka go batla tsa ba bangwe, ka go sa itumelele tse re di abetsweng ke Modimo, mme re bone tse di tlhokegang tota mo botshelong jwa rona, re itumelele tse di molemo tse re nang natso. Jesu Keresete o re ruta gore re tile, le go thiboga mafufa, re se eletsake tsa bomorwa-rre, mme re itumele, fa re na

le letlhogonolo, re lebogele tse re nang natso, re tshabe lefufa, le le ka nnang teng mo botshelong jwa rona, gonne lefufa ga le tshedise.

A re ithuteng go leboga Modimo, Motlhodi le Mmoloki wa rona ka ntlha ya tse di molemo tse re di abetsweng ke ona, ka re le dibopiwa tsa ona. A re ithuteng go o leboga, le fa e le mo malatsing a a molemo, le fa e le mo go a a bosula, gonne re itse gore ke Rraetsho yo o re ratang tota. Re se tshwane le motho yole yo Jesu a buang ka ga gagwe mo setshwantshong sa kajeno, yo o neng a lebala tsa botshelo jo bo sa khutleng ka ntlha ya dithoto tsa gagwe, ka ntlha ya thobo e kgolo ya gagwe, ka ntlha ya madi a le mantsi a gagwe. Botshelo jwa mono mo lefatsheng ga se botshelo ka bojotlhe jwa jona, mme ke jwa sebakanyana fela. Tsotlhe tse re nang natso mono mo lefatsheng di tla sala morago. Re tla tloga mo lefatsheng, re se na sepe, jaaka re gorogile re se na sepe. Modimo ga o batle gore re gopolele tsa sebakanyana se fela, se re nang le sona mo lefatsheng, o a batla gore re gopolele, le go ipaakanyetsa go tsena mo botshelong jo bo sa khutleng.

Motho yole yo go buiwang ka ga gagwe mo setshwantshong ga a fose ka go nna le dithoto tse dintsi, ga a fose ka go ikagela difala tse dikgolo go ipolokela maungo a masimo a gagwe, mme o fosa ka go lebala gore tseo ga di tshedise mowa, a bua, a raya mowa wa gagwe a re: "Mowa wa me, o na le dikhumo tse dintsi tse di lekanyeng dinyaga tse dintsi. Ikhutse, o je, o nwe, o ipele." Molato o tsena teng foo, fa a raya mowa wa gagwe gore o na le dikhumo tse dintsi. Mowa wa rona ga o tshediswe ka dithoto tsa rona, mme o tshediswa ka go ikanya Modimo, Motlhodi le Mmoloki wa rona.

Jesu o a mmita, fa e le lesilo. Motho yo o gopolang gore o tla tshedisa mowa wa gagwe ka dithoto tsa lefatshe ke lesilo. Motho yo o ikanyang dithoto tsa gagwe ka gore di tla tshedisa mowa wa gagwe ke seelele fela, ga a na tthaloganyo. Mo matlhong a ga Jesu Keresete motho yo o ntseng jalo ke lesilo fela.

A re ithuteng mo go Jesu Keresete go baya boikanyo jotlhe jwa rona mo Modimong o e leng Rara yo o rategang wa legodimo. Re itumele, re thabe, re o leboge, fa re abelwa madi le dithoto, re je dijo tsa rona ka tebogo, re nwe ka go itumelela botshelo jotlhe jwa rona, mme re se lebale go leboga Modimo ka go lebogela tse di molemo tse re di abetsweng ke ona, re ikanye Modimo bogolo go dilo tsotlhe, re ithute kajeno mo moletlong wa go lebogela thobo go leboga Modimo ka ntlha ya tsotlhe tse re nang natso.

A Mowa o o Boitshepo o re thuse gore re se le bale Motlhodi le Mmoloki wa rona, re ithute go leboga, re ithute go leboga ka dikabelo tsa rona, re o le boga ka ditshegofatso tsotlhe tse re tshegofaditsweng ka tsona ka bopelotlhomogi jwa gagwe. Re ithute le go abela bahumanegi le batho ba ba se nang sepe; ba ba se nang sepe, re ba abele dijo le tsa dithoto tsa rona gore le bone ba tshele. Bogolo a re abeleng ba ba sa dumeleng Efangele ya ga Jesu Keresete gore le bone ba bone sejo sa semowa. Barategi mo Moreneng, a re ithuteng go batla pele puso ya Modimo le tshiamo ya ona gore mowa o bone boikhutso. A re le bogeng Modimo o o re kgorisang ka tse di molemo, o o kgorisang mowa wa rona ka Lefoko la ona le ka selalelo se se boitshepo sa mmele le madi a ga Jesu Keresete gore re tshele ka go itshwarelwa mo leineng la gagwe. Amen.

9. Thapelo: "Baka MORENA, mowa wa me, le tsotlhe tse di mo teng ga me, bakang leina la gagwe le le boitshepo! Baka MORENA, mowa wa me; se le bale sepe sa ditiro tse di molemo tsa gagwe! O itshwarela maleo a gago otlhe. O golola botshelo jwa gago mo tshenyegong, o go rwesa bopelotlhomogi le mautlwelobotlhoko mo tlhogong. O go kgorisa tse di molemo gore o busediwe bokaung jaaka ntsu. Amen.

Thapelo ya Morena: Rara wa rona yo o mo legodimong ...

10. Sefela sa 18 - 18/19

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke P. C. Weber, ka ngwaga wa 2009.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.